

船山學譜

船山學譜

榆次王孝魚著

瀋陽王火如署



自序

有清一代最具深湛之思想創作之精神者在初葉曰王船山曰顏習齋
在中期曰戴東原曰焦里堂在末造曰譚瀏陽曰康南海之六人者皆各
有其獨到之見解以凌駕前哲啓發來者與夫僅掇拾雜聞之糟粕陸王
之緒餘語錄講章連篇累牘即號稱理學大儒者其淺深高下蓋不可以
同日語或謂清代哲學未爲發達祇考據訓詁臻乎極軌以予觀之非篤
論也習齋之學與現代教育思潮不無吻合故輓近多有稱述之者東原
哲學自近代學者提倡以來研究亦頗有其人瀏陽南海則時代較近流
風未泯學術價值早有定估獨船山思想汪洋浩瀚煙雨迷離後人徒知
其廣博精深而於其內部究未能爲之闡發迄今二百數十餘年其道仍
未能著明於世良可慨也咸同之際湘中諸賢如鄧湘皋曾滌生等曾力
爲提倡其後譚瀏陽復以之標榜號召學者始稍稍注意及之辛亥以前
船山之學風行一時其讀通鑑論黃書噩夢等著尤爲人所樂道然此時

所盛談者特船山政治思想之一面非其哲學之全體也梁任公晚年於清初諸儒致力頗勤且於船山學術稍有發明然亦語焉不詳鉤稽分析之責仍有待於來者豈道之顯晦果亦有數存乎其間非一二人之私力所能左右也耶予束髮受書即好深湛之思憶負笈離家之初家大人授以梁任公所輯德育鑑一書謂之曰此當今之近思錄也孺子讀此而深體力行之庶於進德修業少有裨益其勉行之其後校課之餘每爲披覽雖覺其中不無老生常談而所采船山先生諸條則獨以爲在語錄中別開生面啟發實多予之有會於船山實自此始迨年事漸長稍學史學時同學輩恒取坊本綱鑑爲自修之助家大人則又授以司馬光資治通鑑並張天如歷代史論王船山讀通鑑論二書張氏諸論祇便記憶無甚精采家大人雖責以每篇背誦不足以張興致也於先生書則開卷躍然使人忘倦終日呶唔不絕於口於是船山之印像益深丙辰之春因疾輟學離平赴津臨行之前慮病牀無以遣悶至廠肆選購書籍入門而船山遺

書四字首觸余目亟購之以歸挑燈快讀驚喜欲狂不自知疾疚之在體也自是厥後困頓牀褥幾及三載瘦骨伶俜累瀕於危家中長老咸爲惴惴而予則胸懷坦然意氣益復奮發靜室獨居書冊縱橫仰首高吟俯枕構思人皆謂爲展轉呻吟之苦而不知予之樂有非局外人所能領略者蓋予是時已服膺船山先生盈虛屈信往來原反之說將生死一關早爲勘破矣病愈之後轉學津門講習西哲名著益覺先生之學條理細密體大思精在古代哲人中實爲特出之才居恒謂歷來理學諸儒偏重行爲修養乃於宇宙心性認識論等諸大問題皆未能從純粹知識方面作嚴密之探討精細之闡發大都零碎語錄簡略不詳隨興而談不加組織自宋儒提倡道學以來理學之書雖汗牛充棟而皆爛翻舊帳不脫前人科臼求如船山先生之說理深邃鞭闢入裏新有創發完成統系者實難其選譚瀏陽謂五百年來真通天人之故者船山一人而已初尙以爲言之太過此時乃知其確非阿好其鄉先哲也用是發憤欲將船山思想分析

綜貫勒成一書一以藉新理學書之面目一以聊表多年景仰之忱非敢
以此自矜也年來隨讀隨抄筭記盈篋而在校則困於定課出校則衣食
奔走迄無暇晷可以寫定近日研究中國哲學史者頗有其人私心甚望
有能開我先路俾作參考而以余所知尙付缺如予雖疏陋豈敢仍事因
循以負前哲哉乃撥冗草成付諸手民有同好者或不以爲狂妄而補正
之是則予之厚望也甲戌四月榆次王永祥識

凡例

一本書仿陸子學譜薛子條貫之例將船山言論之涉及哲學者分類纂輯但古人著書不輕立論祇將原料清出未敢加以組織態度雖屬謹嚴而對於往哲既未盡抉潛導幽之功對於來學復未有開卷即得之益此近人所以有明儒學案尙須重作之論也予雖不敏竊取斯意將每類思想融會貫通熟思至再然後排列復於每段首尾各加聯絡之語使一堆散沙之材料宛如一篇有結構之論文庶乎船山思想可條理井然呈現於讀者之前此種體裁尙屬試作組織不密在所難免但期盡忠實介紹之責而已

一船山思想博大精深文字復沉鬱菴結胎息古奧故讀者往往炫於其文之汪洋浩瀚而不易得其條理節文先生之學多年不顯或亦以此本書因之除少數聯絡語外間有以己意詮釋著語稍多之處總期有便讀者非敢唐突古人

一書中所立各目大半爲歷來理學家之熟語不敢以西洋哲學名詞強爲粉飾文中申解亦本此旨見仁見智是在讀者

一大凡哲人之興皆有憑借各種思想不能不有其受胎之因船山先生獨重橫渠故受其影響亦最大其他如孟子程朱東廓佛理等亦皆不無痕迹可尋惟本書目的專以闡發先生思想之原來面目爲主其他探討引申比附參證之功尙爲有待如有大雅補我不足是所深望

一船山先生言論之最精者大半已皆探入本書惟割裂之病在所難免且其他名論仍屬不少未能盡量供諸讀者之前尙希鑒原

一船山先生年譜劉王二種早已行世惟嫌失之過繁且未能十分傳出先生精神故另爲改編以期簡當

一年譜之後附錄各家傳記及譚瀏陽梁任公二人評語對於讀者既可省却繙檢之勞且能藉知船山哲學梗槩惟探討未備容待補輯

船山學譜目錄

自序

凡例

船山先生年譜

船山先生傳記錄

卷一 根本觀念

天下惟器論 一至七頁

依有生常論 八至十六頁

天人相通論 十七至二十頁

人本主義 二十一至二十二頁

卷二 氣化論

論氣化日新 一至十二頁

論太極 十三至二十一頁

論陰陽 二十二至二十六頁

論動靜 二十七至三十八頁

卷三 心性論

論性命日生 一至五頁

論理氣 六至十二頁

論性善 十三至三十一頁

論氣質之性 三十二至三十五頁

附錄 船山知性論 三十六至三十七頁

論情 三十八至四十六頁

論人心道心 四十七至五十七頁

論義內 五十八至六十頁

卷四 修養論

論克己復禮 一至十五頁

論念不可忘 十六至二十頁

論思維

二十一至 十一頁
(無二十九頁實不缺手民誤)

論正心誠意

三十二至四十一頁

論求放心

四十二至四十六頁

論存養省察

四十七至四十九頁

卷五 識知論

論識知

一至五頁

論格物致知

六至九頁

論良知

十至十二頁

論知行

十三至十七頁

卷六 歷史進化論

論歷史進化

一至四頁

論文質名實

五至十二頁

論五行十三至十六頁

目錄終

船山先生年譜

榆次王永祥編訂

公諱夫之字而農號薑齋學者稱船山先生先世江蘇高郵人明永樂間始遷于湖南之衡陽

祖名惟敬伉爽尙大節坐起中句矩終身不見一長吏亦不襍裾于富貴之門竟日口不道一里巷語遇人有不可者面斥無背言居家嚴整課子恒中夜不輟

父名朝聘字逸生一字修侯少師事邑大儒伍學父先生定相先生授徒殆百人公爲領袖雖擊極羣籍制義而究極天性物理斟酌古今務發抒心得之實已遊鄒泗山之門講性命之學承東廓之傳以真知實踐爲學謂武夷爲朱子會心之地志遊焉以顏書室學者稱武夷先生言動易和以誠意爲省察密用以克己爲致力工夫閒居斗室閉目端

坐寂然竟日不聞音響雅不與佛老人遊曾共釋憇山德清辯率性之旨清爲挫屈終身未嘗向佛老像前一揖其篤行類如此

母譚氏

仲父名廷聘字蔚仲號牧石雅意林泉逍遙吟咏晚歲築室垆外號曳塗居蒔花植藥怡然物外工行楷書古詩得建安風骨近體逼何李而上深不喜竟陵體詩

長兄名介之字石子一字石崖號耐園崇禎壬午同榜舉人

次兄參之字立三號礮齋宏光恩選貢生

先生其季也

萬曆四十七年己未（西歷一六一九）九月朔旦先生生于衡州

時父武夷先生年五十譚母年四十三叔父牧石先生年四十四長兄年十四

同時大儒黃梨洲已十歲顧亭林已七歲陸世儀張考夫已九歲前輩

如劉念台已四十二歲孫夏峰已三十八歲

萬曆四十八年庚申（西曆一六二〇）先生二歲

八月光宗即位九月熹宗即位

天啓元年辛酉（西曆一六二一）先生三歲

先生之父武夷公中副榜入國子監在京師

兄石崖公年十六入學補弟子員

是年毛西河生

天啓二年壬戌（西曆一六二二）先生四歲

先生與次兄礮齋同入塾從長兄石崖公受讀石崖曲意怡聲疊疊講

說先生狂娛無度而檠括弛弓閑勒逸馬夏楚無虛時面命無虛日

天啓五年乙丑（西曆一六二五）先生七歲

武夷公仍在京師歷滿應部選先生從長兄受讀畢十三經

是年魏忠賢殺楊漣左光斗魏大中等毀天下講學書院榜東林黨人

姓名示天下

天啓六年丙寅（西歷一六二六）先生八歲

父歸自京師當時選政大壞官以賄定武夷公素矜風規罷選不就
先生仍在家塾

是年高攀龍自沈於池周順昌繆昌期黃尊素等皆死于獄

天啓七年丁卯（西歷一六二七）先生九歲

是年馮少墟卒湯潛菴生

是年十一月莊烈即位魏忠賢伏誅

崇禎元年戊辰（西歷一六二八）先生十歲

先生從父受經義已而父赴京師謁選

是年流寇大起

是年李二曲生

崇禎三年庚午（西歷一六三零）先生十二歲

先生與長兄次兄時以文字與友人相往還

父仍居京

是年陸隴其生

崇禎四年辛未（西曆一六三二）先生十三歲

父歸自京師自是家居十七載不一至郡邑故先生之身沐庭訓者特深家世節錄云先君教兩兄及夫之以方嚴聞于族黨顧當所啓迪恒以溫顏獎掖間坐則舉先正語錄辯析開曉及本朝沿革史傳所遺略與前輩風軌恒謂處人已之間當令有餘親如子弟賤如奴僕且不可一往求盡况其他乎

崇禎六年癸酉（西曆一六三三）先生十五歲

夏從長兄次兄赴武昌省應鄉試

是年萬斯大生

崇禎七年甲戌（西曆一六三四）先生十六歲